



ZIGOS BAAPIWIN
MIINWAA ZHIZHENH
KINOOMAADWINAN

BY **CARA MCKENNA**
WITH PHOTOGRAPHY BY **DAVID STOBBE**
AND **DALLIN SCHMIDT**



ANISHINAABEMOWIN
TRANSLATION
BY **BARBARA A. NOLAN**



BARBARA A. NOLAN

Nesdotmookiid (“Causer of Language Understanding”)

AAPJI GO MIIGWECHWENDAM Barbara Nolan gii-zhaabwiid oodi Canada gaa-zhitood mji-kinoomaagegamgoon wii-mkandwewaad anishinaabemowin. Nongwa ntaa-nishnaabemod , gchi-gbeying megwaach mdaaswaak e-ko-nokiitang wii-zhaabwichigaadeg maanda Nishinaabemowin – Ojibway/Odawa zhigiizhwewin, e-maawnji-zaagtood wii zhichiged dash maanda dibaajmotaadwinan nakaazad.

City of Sault Ste. Marie dash gii mnaajaa’aan Barbara’iin ezhi-gchi-nokiitmanid nwewewin miinwaa inaadziwin. Gii-miingaaa Merit of Award ezhnikaadeg. December 2020 Anishinaabek Nation gii-nagmaa’aan wii-zhigaabwid wi Nwewewin Bimiwijiged.

Geyaabi go nokii oodi Gtigaan Ziibiing Binoojiinyag Enji-Gnawenmindwaa, miinwaa Gchi-ayaa’aa/Inaadziwin Debaatang zhigaabwi oodi Sault College. Daa-ndamgaazo ge gwa ngoji wii-bi-giigdad.

Aapji go Barbara gchi-nendam nishnaabekwe aawid, wiikwemkoong gii-bi-njibaaba, nongwa dash Gtigaan Ziibiing oadaa.





ENDSO KIZHEB, Raylene Cardinal zhinoomaagen bekaanag nehiyawewin kidwin zhiwe msagaakoong enji kinoomaaged, ekinoomoowaajin wi-gkendmowaad. Nongwa, wi kidwin nipin – niibin. Gegaa go aawan wiishkwaa kinoomaageng niibing, miinwaa go binoojiinhag zhiitaawag wii-mnaajtowaad wi Mzawe Anishinaabeg Giizhigad gegoo Anishinaabe nakmagziwin wii-temgak oodi kinoomaagegamgoong.

“Nda-kinoomowaag waa-zhi-kidwaad wi miinwaa edming wi kidwin. Ishki kidwin endso giizhgak, wii-gkendmowaad sa wi omashkiigoomowin miinwaa e-aawiwaad,” kida Cardinal.

Shki-ntam miinwaa niish be midanizwaad eknoomaagzijig oodi sa

netmi-maajtaang kinoomaagziwin oodi sa Kikino Métis Settlement, Alberta ezhnikaadeg, oodi sa enjibaad. Ow sa Wiisaakwadeg eknoomaaged, wii-miinaan sa eknoomoowaajin wi sa dibengaagoziwin miinwaa gchi-apiitendizowin. Moonz wiiyaas miinwaa pkwezshigan (gaa-gdaamwaad wewiib) gii-biidmowaan, miinwaa binoojiinyan maajiinan akiing. E-zaakiigin dbishkoo go naa mashkkigowaaboo, mashkodewashk, miinwaa bgoji-dewminan, wiindamowaan ezhi-mnowaabdag. Wdagonaan Anishinaabe Gigkendamowin kina ngoji gkinoomaaged – ezhi-jependang winaadmowaad eknoomoowaajin wii-moozhtowaad ezhi aankosewaad Wiisaakwadeg miinwaa

Mashkiigowi-inaadiziwin. Niigaaniikdaan Mashkiigowi negmajig oodi sa gkinoomaagegamigong. Gii-niibaanaamaang, gii-gkendaanaa’aa waa-zhi-mashkiigo-ngamwaad niibaanamaa ngamwinan, Medwesing Tataagaansan miinwaa Bekaadag Dibikak.

Makwendaan Cardinal wi pii bemiyaad K-12 gkinoomaageng besha omaa Lac La Biche, gaa-go wiikaa wii-anishinaaben gii-waabmaasiin kinoomaagegamigong, gegoo sa gaaawang zyengak ge gii-naamaagkiba ji-kinoomaagepa. E-naadmaaged Gkiniimaagegamigong gii-naangzhe megwaaj mdaaso-bboon jiiwbwaa mkowaanzhe’ind oodi sa Anishinaabe Waa-gkinoomaagejig Gkinoomaagziwin etemgak sa oodi Shpi-Gkinoomaagegamig Alberta.

Maanda Gkinoomaagewin wiindmaagen dbishkoo go naa aawid “jiimaan shaweyiing e-yaad gchi-jiimaaning” oodi sa enji-gkinoomaageng; egknoomaagzijig debnaanaa’aa mzinigan



Cara McKenna (✉@CaraMcK) is a journalist and editor of *Cree-Métis and Irish descent* and currently lives on Musqueam, Squamish and Tsleil-Waututh lands. David Stobbe is a photographer based in Saskatoon, Sask.



gii-zhaabzhkamwaad gkinoomaadwin. Cardinal 2014 gii-zhaabshkaan, gii-getnaamendam wenjishing wii-miinaad abinoojiinyan oodi enjibaad.

“Ndizhi-gkendaan wi sa giizhpin abinoojiinyag gkenmaa’aad e-gknoomoowaagojin, gkendmowaad di-inaadiziwiniwaa miinwaa diniweweniwaa, ooshme da gashkiyewiwag. Kiin sa gechi-apiitenminaagozid gdaaw niigaan oodi nyaaniibowid” kida sa. Wiijgaabwitaage maaba Cardinal, zhiwe sa e-myaajiiging zhichigewin neyaab wii-miigweng inaadiziwinwii zhiwe sa enji-gkinoomaageng – wi sa memdige e-piitendaagwak gonda sa gaa-zhaabzhkangig mji-gkinoomaagegamigoon epiich dbaachigaadeg wi sa Debwewin miinwaa Boonenindiwin Anokiwin. Megweying zhiwe zhaangsomdana zhi niwin nendwendaagwak gegoo wii-zhichigeng e-dgosing omaa bimiwijigewin maawnji-shkwaach dibaajimowin, niibna zhibiigaade gkinoomaagewin miinwaa eshkiniigijig, neniizh go zhinoogemgadoon ooshme weweni wii-gkendmowaad eknoomoondwaa Anishinaabe aki-noomaagaazjig miinwaa aabdeg ji gkinoomoondwaa mji-gkinoomaagegamgong gaa-zhiwebag, nakondiwinan miinwaa Anishinaabe gaa-bi-zhidagomiigwed miinwaa go megwaa e-zhi-dagomiigwed manpii Canada ezhnikaadeg.

Aapji go nongwa memdige ndawendaagoziwag Anishinaabe gkinoomaagewininwag/kwewag zaam

ogimaag gkinoomaagegamgoong gnowaamdaanaawaa ne’en sa ndawendaagwag wii-zhichigeng gegoon. Anishinaabe gkinoomaageniniwag/kwewag Gkinoomaadwin dbishkoo go naa oodi Shpi-gkinoomaagewigamig eteg Alberta aapji go ne’en da-naadmaagemgadoon, ni’i dash wii gwa nonda noodesewaad egkinoomaagejig aapji znagad wii-mkagaazwaaad miinwaa wii-gnawenjigaazwaaad egknoomaagejig.

Owi sa Rideau Hall Foundation ezhnikaadeg, gaawiin zhoonyaa gashkitosiinaawaa gonda, ni’i dash wii gwa naaknigewag wii- “zhitowaad ooshme wenjishing Canada ezhnikaadeg aki,” e-getnaamendaagwak naaknigewin daa’aanaa’aa wii-aasgaabwitmowaad wii-gkinoomaagaazwaaad miinwaa go wii-aanghechigaazwaaad ooshme niibna gkinoomaageninwag/kwewag e-nishnaabewijig. Naaknigewag dash wii-niigitowaad minik sa Anishinaabeg, Inuit miinwaa Wiisaakodeg egkinoomaagejig manpii Canada mdaaswi shi-mdaaswaag – gegkendaasjig kidwag gchi-gegoo da aawang wi.

GCHI-GBEYING GII-GKINOOMAAGEWI Chris Scribe oodi sa Saskatoon ezhnikaadeg aki. Mashkodeng gii-bi-nji-kognigoon ne’en ookmisan Nakoda, “Jedi ogimaa” gaa-zhinkaanaajin zaam gii-mshkowendamoon, gii-nbwaakaa’oon miinwaa gii-mshkozii. Gii-mjignaan wdoo-Nakoda inaadziwin aanwi go aanwi oodi mji-gkinoomaagegamgoong

gii-zhaad gii-abinoojiinwid. Gii-aankenmowaan dash wii gwa Scribe’an miinwaa ezhi-ngododegizwaaad.

Aapji go gii wnendam wii-kognaad gwaya ge-chiipitendang e-aawid.” Kida Scribe, wenjibaad oodi Bmwidoon Akik Nakoda Nation ezhnikaadeg oodi sa Saskatchewan miinwaa Norway House Cree Nation ezhnikaadeg oodi sa giuwedinong Manidowaabi. “Nmiigwechwendam gii-bi-kognigowaanh wi nikinging.”

Nongwa dash aawid egkinoomaaged, Scribe nastwaamdaan sa wi Anishinaabe Gkendaaswin ezhni-mooshkneshkaagwaat eshkniiigijig Anishinaabeg, Inuit miinwaa Wiisaakwadeg – memdige gwa ge’ek gaa-zhisesigwa wii-gkendmowaad dinaadziwiniwaa naasaab wiin. “Naa-niibwiyin niigaan aajkinganing gkinoomaagegamgong, maadookiyin Anishinaabe gkendaaswin, enakiying sa aawan wi bgidnaaying gdaknoomaagnaang wii-bmose’aad boonenjige miikaansing...Gniishnaabemnaanig aapji nindwendaanaawaa wi” kida. “Gdashmaanaa wdoo-jijaakmiwaan, gbiskaabwinowanaanig mooshkin e-yaawiwaad. Mi wi e-gknoomaaged e-Anishinaabewid, mooshkin genaajwang gkendamowin ge-doodwaaad Anishinaabensan.”

Ge’ek dash e-gkinoomaagzijig e-nishnaabesigog, wi sa naasaab gkendaa swin ooshme weweni daa-nsastaanaa’aa Anishinaabeg gaa-bi zhiwebziwad maanda go naa gii-biaanjchigaadeg kina gegoo



bimaadzwiniwaa, miinwaa da-aajtoon-aawaa e-zhi-gnowaamdamwaad maanda akiing ednakiwaad miinwaa go gaa-bi-zhiwebziwaad. Bagwana dash wii gwa, E-gkinoomaagejig e-anishinaabewijig e-maajii-gkinoomaagejig “aapji go pane maamiigaazoog” kida Scribe. “Pane go nmiigaadaanaa maanda Anishinaabe gkendaaswin naasaab wii-zhi-daanigaadeg – weweni gwa – gegkenzigog Anishinaabe gkendaaswin ji kidwaapa “nishke, gdaa-mno-doodaagonaa go maada; gdi-izhichigewininaa go daa-mno-doodaagonaa’aa maanda.”

Scribe kida sa ezhi-gkendang, bezhig sa wi nji aaniish niibna Anishinaabeg gaa-onji-gshkewizisigwaa shpi-gkinoomaagegamigong zaam ne’en gkinoomaagegamgoon gaawiin wiinaa onji gii-nji-zhichigaadesinooon wii-gashki’ewziwaad giizhpin eta wii-dgongiwaad wentigooshiing. Wentigoozhiig ezhi-gnowaamdamwaad gashki’ewziwin gaa’ii miiksesnoon Anishinaabe’aadziwin nikeying, gegoo sad aa-aawan wiingadmowaad aanind e-aawiwaad oodi sa shkwaandeming pii biindgewaad ishpi-gkinoomaagegamigong. Geyaabi dash go, bemaadzijig eyaajig bagodkana aabdeg wii-aanjiwag, mii sa temgak gashkowaabwin (miinwaa gaa zhoonyaa deb sesiiim) wii-zhaawaaad ishpi-gkinoomaagegamigong.

Scribe gii-zhaabshkaan gkinoomaadwin 2005 oodi sa Ishpi-gkinoomaagegamigong Saskatchewan Anishinaabe Gkinoomaagewinini/kwe Gkinoomaadwin – wi sa bezhik e-maawnji mnoseg

miinwaa gbeying zhaazhi etemgak wi dno’og nikeying. Scribe wiindmaage sa wi gii-gshkewizid gii-tenig waankii’endamowin gaa-tomaagaazjig Anishinaabe gkinoomaagewinwag/ikwewag wii-gshkewiziwaad. Maanda sa gkinoomaadwin da toonaawaa ishkwanganing bemaadzijig zhiwe wii-daapnamwaad gkinoomaagziwin gaa dash memkaach daa aanjiisiwag. Gaanzmiimgad dash e-gkinoomaagezjig wii-gkendizwaad miinwaa wii-maadookiwaad di’inaadiziwiniwaa.

“Gii-aawan sa wi bezhig dawising gii-mno-zhiyaa’aanh miinwaa gii-aawyaanh e-aawiyaanh miinwaa wii-zhaabshkamaanh wi sa e-miik-

“Giizhpin abinoojiinyag
gkenmaa’aad
e-gknoomoomaawaajin,
gegkendgig
wdi-inaadiziwiniwaa
miinwaa **di-niweweniwaa**,
ooshme da
gashkiyewiwag.”

sesinog Anishinaabe nikeying” Scribe kida. “Gkii-gkendaan na, aabdeg wii-zhitowying wi dno’og, wii-gshkingidwaa waa-aanjtozig gegoo miinwaa go gkinoomaagewinan e-nishnaabewangin manpii mzawe kiing, mii wi waa-zhichigewaad... wii-gashkingidwaa gdagkinoomaagninaanig wii-biindgewaad omaa mashkowendamowaad e-aawiwaad.

Yeskad nongwa bboong, maanda sa ezhnikaadeg Rideau Hall Foundation gii-gikendami’iwewag ishki’ntam zhoonyaa gii-towaad Anishinaabe gkinoomaagewinini/kwe wiikjitowin, \$13.2M wii-maadooking niizhwaaswi ishpi-gkinoomaagegamgoon mzawe Canada ezhnikaadeg. Maanda zhoonyaa maandingda naadmaagemgad zhitoong ishkeyin Anishinaabeg bembidetowjig Anishinaabe gkinoomaadiwinan miinwaa go zhiibaashtowaad aazhi etegin. Na’iina giikami-bimojigewin nagajitjig naadmaagewag, dagoboog Yvette Arcand, e-niigaanziikdang Anishinaabe Gkinoomaagewininiwag/kwewag Gkinoomaadwin oodi sa Ishpi-gkinoomaagegamigong Saskatchewan, David Perley, gaa-niigaanziikdang ko.

Mi’kmaq-Wolastoqey Centre oodi sa Ishpi-gkinoomaagegamigong New Brunswick, miinwaa Roberta Jamieson, gaa-zhitoon Indspire.

Bill Mintram, e-gimaawid sa oodi Anishinaabe miinwaa giiwedonong bemiikang oodi sa Rideau Hall Foundation ezhnikaadeg, kida sa aanwi go wi wendnakiing gii-wewiibendmoog wii-zhichigewaad, gii-gii-gchi’inendaagwad dash wii gwa wii-apenimowaad wii-mno-wiidookdaadwaad dazhiikewining miinwaa e-gkinoomaagejig ntam.

“Gaa go maamdaa ji zhi-biindgegwaaashkniingiba dawising, gchi-niibna zhoonyaa ji toongiba oodi mii dash ji-nendgingiba gii-gshkitoying kina gegoo ge nendmingiba,” kida Mintram, wa sa gaa-zhaabshkang Saskatchewan Oodena Anishinaabe Gkinoomaage Gkinoomaagziwin, yeshpi-



gkinoomaadwin mazinigan gaa-bagidinimaaged Gabriel Dumont Institute gaa-wiidookwaad University of Regina miinwaa University of Saskatcewan. “Giizhpin zhichigewiin wi, gaawiin ka-gashkitowsiin wii-debnaman waad-e-b-n-a-m-b-a, z-a-a-m g-a-a-w-i-i-n da-wiidookaasiim nikeying niigaani-iwang maamwi wii-aanjtong; memkaaj dash da aawan dbamaadwin miinwaa jina da-te.”

Epiitendaagwak maanda giikmi-bmoojigewin, kida, “kina gwaya maawnjidwaag naasaab aawiwaad. Pii maawnjidiwaad wii-dbaatamwaad Anishinaabe Gkinoomaage gkinoomaadwin, aapji go gchi-piitendaanaa’aa waa-ni-zhewebdinig dazhiikewiniwaan miinwaa nendmoog

wii-giikmigewaad, gaa-bi-zhi-gken-mowaad miinwaa waa-ni-zhiwebag miinwaa go ge zhi-nkweshkamowaad zengak.

Andrea Brazeau Inuk aawi Kangiqsualujjuaq, Nunavik onjibaa. Gii-wiidookaaza omaa giikmi-bmoojigewining piish go nongwa gii-mnokamig. Ulluriaq Gkinoomaagegamigong oodi sa enjibaad. Gaachin wi Kangiqsualujjuaq, pii dash Brazeau gaa-bskaabiid gii-yaang wi McGill Shpi-Gkinoomaagegamig 2021 gkinoomaage mzinigan, dazhiikewin gii-mno-waawiindaganegaaza mshkodedaabaani niibne’oosewineng. Niswi miinwaa niwin be mi dinizing gii-gkinoomaage, ni’iing dash gii-ni-aandnakii naamaaged gkinoomaagegamigong gaa-shkwaa-w-a-a-m-d-a-n-g d-a-w-e-n-d-a-a-g-w-a-k naadmaagewin ooshme wii-gki-noomondwaa e-gkinoomaagzijig ezhi-bimaadizing. Mii dash wi gki-n-o-o-m-a-a-g-e-d, w-i-i-k-j-i-t-o-o-n wii-aankwenmaaged inaadiziwin gki-noomaagewin ezhi-gshkitood zhiwe sa wdazhiikewining – pane go maajiinaad akiing miinwaa Inuktitut-mowaad. Epiichi gkinoomaagaazwaaad, egkinoomaagaazjig da-bba-nkakewag, maa ge Gichi’aa da gkinoomowaan waa-zhi-pkonaawaad askiganan.

“Niibna go e-gkinomaagzijig gaa-nokiitowgig gii-yaanaa’aa dibisendizwin.

Gii-zegziwag wii-wnisewaad gki-noomaagegamigong,” kida Brazeau. “Piish wii gwa maajiingazwaaad akiing, aapji go bkaan aawiwaag. Gegeti go e-aawiwaad bi-aawiwaag. Noondaash temgad ojanmendamowin, ooshme noondaash godagtoyendimowin.

Maamnonendang wi sa gii-shkinokiid gkinoomaagegawining, Brazeau kida naadgondong gii-zhiyaa wii-bagidendang wdi-inaadziwin wii-debnang dashwi sa yaabshkimazinigan. Nendam dash wii gwa niigaan aanikobjiganag ji debnamwaaad gashkewiziwini-mziniganan gaa dash memkaaj da-maajaasiwag wdazhiikewiniwaa.

“Bezhiig e-maawnji-mchaag aawan sa wi aanjtowiing ezhi-gnowaamdamang gkinoomaagewin e-aawang, nji-maajtaamgad dash zhiwe zhichigewining,” kida. “wi sa zhichigewin gaa-zhaabzhkamaanh, aapji go gii-yaabshkie aawan, miinwaa dash go niibna Inuit gashkitowsiinaa’aa wii-zhaazhkamwaaad wi izhichigewin.”

Scribe debwetam. “Gaa maamdaa ji-aanjtoongiba gkinoomaagegawining giishpin aabji zhichigeying naasaab nikeying ko gaa-bi-zhichigeying,” kida.

Miin Giizis 2023 maanda sa Rideau Hall Foundation gii-toon ishki-ntam Anishinaabe egkinoomaagejig nkwehkdaadiiwin oodi sa Calgary, miinwaa





gii-dgonaan Anishinaaben, Wiisaakwaden, miinwaa Inuit mzawego Canada enjbaajig. Gaa-bi-zhaajig gii-ggwejmigaazooq wii-gnowaamdawaad aanii gi'enh ge zhinaakiba niigaan ge zhinaagkiba ooshme mdaaching mdaaswaak yaawaad Anishinaabe gkinoomaageninwag/kwewag. Nkwetamowinan gii-dgosnoon "wi Canada ezhnikaadeg aki ooshme mzawe zhi gnowaamjigaade" miinwaa zigos baapwin miinwaa zhishenh kidomaadwinan."

Pi iwi igikinoomaagewigamig giimaajii miigwed ishki ntam zhoonyaa, niwing gii-zhignowaamdaanaawaa – Iniwewin, aki, niigaaniziwinn miinwaa zaagidwin – gaa-bi-njibaamgak gaagkenjigaadeg nkwehskdaadiiwining. Mintram kida ntam sa miigweg zhoonyaa gii-baazhijkaadaankina gwaya gaa-nendang jizhiwebkiba. Wii sa igikinoomaagewigamig niibna bigiigdown gikinoomaagewigmigoon gaa-debnazgwaa zhoonyaa gii-debnaanaawaa aanwi dash go niigaan zhaawag wii-zhichigewaad gaa-zhi-waamdawaad. Aapji nishin wi, kida Mintram, zaam gii-zhi-gnowaamdaanaawaa ooshme niibna wii-yaawaad Anishinaabe egkinoomaagejig mdaaching mdaaswaak minik da-gshkichigaademgad wiidookaazang maanwi gkinoomaagewigamigong kina ngoji.

Giizhpin eknoomaagzid gii-zhaabshkang kina da-yaabshkiwe gkinoomaagziwin wiikaa waambmaasig wiji anishinaaben, megwaa

wi-da-zhiyaawag wi sa aawang naang-zhewin ge maajiidowaapa dazhiikewiniwaa ji nishingiba, gaa'ii tesnoo," kida. Zaam gaa'ii gii-naaknigesiiim."

Scribe waamdaan enakiid egkinoomaagedawang sa gichi-izhichigewin. Mozhaman, Murdo Scribe, kina gwaya gii-gikenmaan

Epiichi
gkinoomaagaazwaad,
egknoomaagaazjig
da-bba-nkakewag, maa ge
Gichi'aa da gkinoomowaan
waa-zhi-pkonaawaad
askiganan.

nonda Mashkiigow-gkinoomaageninwan gaa-zhibii'ang niibna mziniganan oodi sa Manitoba Ministry of Education miinwaa gaa-maadookiid oodi sa akiins Anishinaabe gkinoomaadwining. Jiibwaa miinind wi ji-gkinoomaagzid oodi University of Saskatchewan gkinoomaadwin, Scribe bbaa-nokiitaage, mtigoonsan gii-gtigaanaan miinwaa bmidake. Pii dash gaa-maajtaad gkinoomaagzid, gii-mkaan waa-zhi-mnowaabdizid. Gii-wiindmowaan Mozhaman oodi sa manidoo-kiing ji zhichiged ezhi-gshkitood gwa wii-ni-zhichiged wiin ko gaa-zhichiged, wii-mno-gnowaamjigaadeg sa gakinoomaagewin aawang sa "

bemaadzijig wii-zaagidwaad miinwaa wii-nsastamwaad e-aawying, gdwendaagninaanig wii-mkamwaad e-aawiwaad, gdwendaagninaanig wii-zaagidwaad miinwaa wii-nsastamwaad gdi'inaadziwininaanh miinwaa ezhi-bimaadziying."

Megwaa dash oodi Kikino Wiisaakwadeg Ednakiiwaad, maanda gkinoomaadii-bboon zhigo wii-shkwaamemgad. Raylene Cardinal da-gkinoomaagnan gchi-inendamooq wii-ke-boontaawaad niibing. Dbizhominzigaansan gii-giizhchigaadenoon, miinwaa Cardinal nokiiyaan wi Gkinoomaagegamgong BBoon Mzinigan. Gii-ggwejmaan wda-kinoomaagnan, "Wenesh waa-aawyin pii ni piitziyin?" Aanind abinoojiinyag zhiwe sa enji gkinoomaaged aachkinganing mdaaswishi niwinn yaawaad, gii-kidwag egkinoomagenh wii-aawiwaad. "Minwendaabminaaagwad," aanind gii-wiindmowaa'aan wdagkinoomaagewinwaa. "Abinoojiinyag nwii-gkinoomowaag," kida bezhig abinoojiinh, gchinendmotaagozi.

Zhoobiingwena Cardinal. "Gchinendaagwad noondming kidwaad sa yaamwaad nonda msawendamowinan egkinoomaagejig wii-aawiwaad." 🌐



This feature was produced in partnership with the Rideau Hall Foundation. To learn more about how Indigenous teacher education programs are creating positive change, visit cangeo.ca/indigenousteachers